



Comune di Quartu Sant'Elena
Comunu de Quartu Sant'Aleni

I.C. "Porcu Satta" – Classis 2^a C, 2^a E e 2^a F

A.S. 2023/2024

Quartu Sant'Aleni, su 21 de friaxu 2024

Progetu "Is parcus nostus" in lingua sarda

Su Gulfu de Casteddu:

Su Gulfu de Casteddu (Golfo degli Angeli) e sa Sedda de su Tiàulu (Sella del Diavolo). S'àcua in colori de celu de su Gulfu luxiat asuta de su soli cun lìnias luxentis chi si tremiant in su fundu biancu de s'arena. Su soli fiat giai artu. Su mari che tàula e sa tupa aici frima chi pariat abetendi calincuna cosa. Nemus si ndi fiat acatau ca a pagu a pagu su colori asulu de su celu fiat diventendi biaitu. E de arrepeni unu tronu, una tzacarrada longa, forti che trumba. Unus cantu ogus de braxa castiendi in artu iant biu un'àchili manna ghetendi tzèrrius in su celu sèmpiri prus scuriosu: <<arguai, arguai a bosàterus, dimònius, bandai-si-ndi de custu paraisu o candu a ùrtimu, eis a intendi a is àngelus sonendi sa trumba, bosàterus eis a fai finitia mala>>. Totindunu su celu ghetat unu lampu mannu de luxi chi allùmiat su mari, is arrocas, su matedu e finas is dimònius asuba de is cuaddus nieddus, ca fiant arribendi is àngelus. E in su gulfu de arrepeni scurigat. S'arcàngelu Micheli ndi pesat sa spada e chistionendi cun boxi forti ma druci iat nau: <<poita ndi ses arrutu de su celu, o Lutziferru, steddu de mengianu, fillu de sa nea, de custu Gulfu no ses su meri e no ddu podis arruinai diaici>>.

Arrajus e tronus, terremotus e strasuras de làndiri cumentzant candu sa spada de umbra de Lutziferru tocat una de is alas luxentis de Micheli. S'arcàngelu intendit su dolori de sa terra sciuta, de su cinixu, de s'àcua trulla, de noti de cilixia, de putzu sena de àcua, de ogus sena de bisus. Ma Micheli nd'iat pesau sa spada de luxi e cun unu corpu iat segau su scuriori, su fàmini e sa gherra, sa poburesa e sa timoria, sa maladia e su bisòngiu, totu su chi est dannàrgiu a sa carri e a sa spera. Is dimònius nd'arruiant de su celu e Lutziferru, fuendi-si-ndi, nci fiat arrutu de cuaddu. Su capu de is dimònius, bolendi, si ndi fiat fuiu, ma sa sedda manna de su cuaddu nci fiat arruta a mari, diventendi pedra candu iat tocau s'àcua. De insaras a cuddas arrocas ddis nant Sedda de su Tiàulu e su Gulfu est connotu comenti a Gulfu de is Àngelus.